

MALONGI YA TATA PISEKOPO NA MPIMPA YA PAKE

Bubu, na kati-kati ya mpimpa yai, Dibundu ya mvimba kele kuyangalala na kiese sambu Kristu me futumuka na bafwa, yandi ke yita beto na bwala ya Tata na yandi.

Yandi me lungisa mpila yina diswekamu ya nene ya lukwikilu na beto, diswekamu ya lugulusu ya bantu, mutindu ntumwa Polo ke bambula beto yo: « Kana Kristu kufutumukaka ve na bafwa, lukwikilu na beto zolaka kuvanda ya mpamba ».

Nsungimina yina ya nene ya lufwa ti ya lufutumuku ya Kristu mene lungama kibeni, bubu yai na kati-kati ya mpimpa yai ya santu, mpimpa ya kiese, mama ya bampimpa yonso ya santu, bonso vandaka kuzabisa santu Augustin, mpimpa ya Pake, mpimpa ya bana ya Israel mene sabuka nzadi mbwaki na makulu ; mpimpa ya bo imene kudia na nswalu yonso mwana dimeme ya imene sumbulula bo kimakulu, mpimpa ya Kristu imene kununga lufwa, mpimpa ya nkengo ya tiya mene temuna ntima ya bakristu na ndinga ya Nzambi, mpimpa ya beto ta bambuka diaka bisakramento ya nene-nene ya mbotika, ya nsiamisa ti ya Ukaristia, madia ya luzingu ya mpa.

Bampangi,

Beto lenda simba na mpimpa yai nde : Nzambi kele nkwa lutondo. Yandi ke yambulaka ve bantu na yandi, ye yandi ke lungisaka balusilu na yandi yonso. Tala ! Kristu, mwana ya Nzambi kutindaka, ikele sumbulula beto na lufwa ti na lufutumuku na Yandi. Tuka mbotika na beto, beto me ndima na kufwa kumosi ye Kristu sambu na kufutumuka kumosi ye yandi. Kristu me kuma sambu na beto muntu ya ke gulusa beto na lufwa, ye menga na yandi ke katula beto na kimpika ya masumu.

Mutindu Nzambi me futumuna yandi na lufwa, yandi me pesa yandi kisika yantete na zulu.

Kristu ya mene futumuka kele diaka ve ti nitu na beto bantu, yandi me tambula nitu ya kimpeve ye ya kinkembo. Yandi kele na bisika yonso ye yandi lenda kudisonga na bayina kele na lukwikilu, bonso yandi kudisongaka na bankento ye na bantumwa na yandi na mene-mene ya lumingu ya Pake. Beto kangula meso na beto na kusengumuna yandi na Ukaristia, na ntangu yandi ke pesa beto madia ya lugulusu konso mbala ya banganga Nzambi ke zenga mampa na kusala mutindu yandi mosi kusalaka.

Lufutumuku kele diswekamu ya lukwikilu. Bantu ya ke zabisa beto nsangu yai ya lufutumuku, bo mosi me vanda bantu ya ntete ya kukwikilaka na mambu yai. Bo me kwikila ntete, na ntwala bo kumwanga yo : Maria Madelena (Jn 20,16); Petelo ti Yoani (Jn 20,5-8), balongoki ya Emmaüs, Thomas (Lc 24,32), Bantumwa (Lc 24,42).

Bampangi bakristu,

Mono pisekopo na beno ke zola nde nkinsi pake ya mvula yai kusadisa bakristu yonso ya Idiofa na kukwikila bo mpi na lufutumuku ya Kristu na ntwala bo kwenda kuzabisa yo na bankaka. Beto yonso kukangama ngolo na makieleka yai, kifulu wapi lukwikilu na beto ke zwa nsimbulu ya kieleka. Ye beto kunata nsangu yai ya lufutumuku na bisika yonso ya beto ke zinga.

Beto kuvila ve nde Yezu, na ntwala yandi kufutumuka na bafwa, yandi mene kunata, ya kukonda disumu, luzingu ya beto yonso ke nataka na ntoto yai: Na Maria, yandi me baka nitu na beto

bantu ; yandi me yela bonso beto ye me tambula badienga ye mazaya, yandi me sala kibansa ya nzala ; yandi me mona mpasi na kulunsi, yandi me fwa. Kansi mpi, Kristu me zingila mambu ya kiese : yandi me vanda na bankinsi makwela, banduku na yandi me yamba yandi mbala mingi na banzo na bo sambu na kudia kumosi ye bo... Disongidila nde, bisalu na beto yonso ya ntoto yai, Kristu me santisa yo na lukituku muntu na yandi. Ye bisalu yina yonso fwete mpi kuluta na nzila yai ya lufutumuku , kwa muntu fwete yandi mpi kusosa na kununga mampasi yonso, kusosa na kubasika na nzila ya masumu na kutambula nitu ya kimpeve ye ya kinkembo. Kele nitu yai ya mpa y' ata sadisa konso muntu na kubikala na kati ya familia yai ya nene ya bana ya Nzambi ye na kukaba nkembo ya lufutumuku ya Kristu ke pesa beto. Santu Polo ke zodila nde, na luzingu ya ntoto yai, beto kusosa ntangu yonso mambu ya zulu sambu na kusonga nde beto mpi me futumuka kumosi ye Kristu (Cf. Col 3,1). Yonso yina ke songa nde mambu yonso ya ntoto yai lenda kulungama ve yo mosi nkatu kusosa na kukangama na mambu ya zulu.

Ye mutindu ya mbote na kusantisa bisalu na beto yonso ya ntoto yai ikele kulanda mbandu ya Kristu. Bonso yandi, beto kuyunsa, na bandambu yonso ya beto lenda kulutila, na kusala kaka mambote. Beto sosa ntangu yonso na kuzingila kimpangi ya kieleka ; beto kusosa na kuyalumusa masonga ti ngemba ; beto kulemba ve na kusadisa bampangi ya ke mona mpasi, na kuyamba mbote banzenza... Na bunkufi, beto zingila ntangu yonso lutondo ; beto kulemba ve na kunwana bitumba ya kimpeve ti satana ye ti bisalu na yandi yonso ; beto losa ntama mambu yonso ya imbi ya lenda bwisa bimvuka na beto : nkabisa, kimpala, bimbeni, kutonga tonga ye kubangika bampangi, madeso ya bana (corruption)...

Beto kanina ntangu yonso mbotika ya beto me tambulaka sambu na kubikala ntangu yonso ya kukangama ngolo ti Kristu ya me futumuka, mutindu yina beto ta tambula luzingu yampa ya Kristu ke pesa beto na nima ya lufutumuku na yandi.

Bika nde bisambu ya mama Santa Maria kusadisa beto na kubikala ntangu yonso bantu ya ke wa malongi ya Kristu sambu na kupesa na diocese na beto ye na ntoto na beto luse ya mpa.

Mono ke kuzodila beno yonso nkinsi Pake ya mbote ye ya ngemba!

Mono Pisekopo na beno

+ José MOKO EKANGA